



**ზოგადსაგანმანათლებლო
დანესაბუღებების ავტორიზაციის საბჭო**



24/07/2026

MES 9 26 0000974402

გადაწყვეტილება

**ზოგადსაგანმანათლებლო დაწესებულებების ავტორიზაციის საბჭოს
2026 წლის 09 ივნისის N689270 ოქმის მე-2 ნაწილში ცვლილების შეტანის შესახებ**

ზოგადსაგანმანათლებლო დაწესებულებების ავტორიზაციის საბჭოს სხდომაზე გამოვლენილი გარემოებების შესწავლის, შეფასებისა და ურთიერთშეჯერების შედეგად, საქართველოს ზოგადი ადმინისტრაციული კოდექსის 63-ე მუხლის პირველი ნაწილის საფუძველზე,

საბჭომ გადაწყვიტა:

1. შევიდეს ცვლილება ზოგადსაგანმანათლებლო დაწესებულებების ავტორიზაციის საბჭოს 2026 წლის 09 ივნისის N689270 ოქმის მე-2 ნაწილში და ჩამოყალიბდეს შემდეგნაირად:

**„2. შპს - ხერხემის კერძო სკოლაში განხორციელებული
მონიტორინგის შედეგების განხილვა**

ზოგადსაგანმანათლებლო დაწესებულებების ავტორიზაციის საბჭოს თავმჯდომარემ, ეკატერინე წიფურიამ, დაწესებულებების წარმომადგენლებს მიმართა, ხომ არ ჰქონდათ საბჭოს წევრების მიმართ აცილება. დაწესებულების წარმომადგენლებმა დაადასტურეს, რომ საბჭოს წევრების მიმართ აცილება არ ჰქონდათ. საბჭოს სხდომის თავმჯდომარემ მიმართა საბჭოს წევრებს, დაედასტურებინათ, რომ იცნობდნენ ავტორიზაციის ექსპერტთა ჯგუფის დასკვნას და დაწესებულების მიერ წარმოდგენილ არგუმენტირებულ პოზიციას დასკვნის პროექტთან მიმართებით. საბჭოს წევრებმა დაადასტურეს, რომ იცნობდნენ საქმის მასალებს. საბჭოს თავმჯდომარემ ჰკითხა დაინტერესებული მხარის წარმომადგენელს, იცნობდა თუ არა ავტორიზაციის ექსპერტთა ჯგუფის დასკვნას. წარმომადგენელმა დაადასტურა, რომ იცნობდა დასკვნას. შესაბამისად, საბჭოს სხდომის თავმჯდომარემ საბჭოს მდივანს სთხოვა, ექსპერტთა ჯგუფის დასკვნა დაერთო ოქმისთვის, როგორც მისი განუყოფელი ნაწილი.

ექსპერტთა ჯგუფის დასკვნა, საბჭოს სხდომაზე, წარადგინა ზოგადი განათლების ხარისხის უზრუნველყოფის ექსპერტმა, ნინო შიუკაშვილმა. ექსპერტმა განაცხადა, რომ ავტორიზაციის პირობების შესრულების შემოწმების მიზნით, გეგმიური მონიტორინგი განხორციელდა ადგილზე ვიზიტით.

სკოლა ახორციელებდა ზოგადი განათლების დაწყებითი, საბაზო და საშუალო საფეხურის ზოგადსაგანმანათლებლო პროგრამებს, ქართულ ენაზე. ზოგადსაგანმანათლებლო დაწესებულებების ავტორიზაციის საბჭოს 2023 წლის 21 მარტის №322188 გადაწყვეტილების თანახმად, დაწესებულებას მოსწავლეთა ადგილების ზღვრული რაოდენობა განესაზღვრა 175 მოსწავლით, ხოლო აქტიურ მოსწავლეთა რაოდენობა იყო 107.

ექსპერტმა, ნინო შიუკაშვილმა, განმარტა, რომ ექსპერტთა ჯგუფს, ცენტრის დირექტორის ბრძანების საფუძველზე, დაევა ზოგადსაგანმანათლებლო დაწესებულების ავტორიზაციის პირველი, მესამე და მეოთხე სტანდარტების შეფასება.

ექსპერტმა ისაუბრა ზოგადსაგანმანათლებლო დაწესებულებების ავტორიზაციის სტანდარტების შეფასებაზე და აღნიშნა, რომ პირველი სტანდარტი და მესამე სტანდარტის 3.1, 3.2, 3.3 და 3.4 კომპონენტები შეფასდა, როგორც „არ შეესაბამება სტანდარტის მოთხოვნებს“, ხოლო მეოთხე სტანდარტი შეფასდა, როგორც „შეესაბამება სტანდარტის მოთხოვნებს“.

საბჭოს თავმჯდომარემ, ეკატერინე წიფურიაძე, დამაზუსტებელი კითხვით მიმართა ნინო შიუკაშვილს სასკოლო ბიბლიოთეკის განახლებასა და სკოლაში პანდუსის არსებობასთან დაკავშირებით. ნინო შიუკაშვილმა, აღნიშნა, რომ ადგილზე ვიზიტის დროს სკოლაში ბიბლიოთეკასთან დაკავშირებული დოკუმენტაცია სრულად ვერ წარმოადგინა, თუმცა შემდგომში წარდგენილი დოკუმენტებით ტექნიკური ხარვეზი სრულად აღმოიფხვრა და აღნიშნული საკითხი სტანდარტის მოთხოვნებს სრულად შეესაბამებოდა. რაც შეეხება პანდუსს, სკოლას მიეცა რეკომენდაცია, ბრძანებით განესაზღვრა პასუხისმგებელი პირი, რომელიც უზრუნველყოფდა შეზღუდული შესაძლებლობის მქონე პირის დახმარებას დაწესებულების ტერიტორიაზე გადაადგილებისას. აღნიშნული რეკომენდაცია სკოლამ გაიზიარა.

საბჭოს თავმჯდომარის მოადგილე თამარ მამსიკაშვილმა, კითხვით მიმართა სკოლას. კერძოდ, მისი კითხვა შეეხებოდა სკოლაში მასწავლებელთა შერჩევის პროცესსა და წინა ვიზიტის ფარგლებში ექსპერტთა მიერ გაცემული რეკომენდაციების შესრულების საკითხს. სკოლის დირექტორმა, ბელა კაპანაძემ, აღნიშნა, რომ სკოლას უკვე ჰყავდა ორი ახალი მასწავლებელი და დამატებით გამოცხადებული ჰქონდა ვაკანსია სხვა მასწავლებლების დასაქმების მიზნით.

რაც შეეხებოდა წინა ვიზიტის ფარგლებში გაცემული რეკომენდაციების შესრულებას, მისი თქმით, აღნიშნული მიმართულებით სკოლას უკვე გადადგმული ჰქონდა ქმედითი ნაბიჯები და უახლოეს მომავალში შეეცდებოდა ყველა რეკომენდაციის სრულყოფილად შესრულებას.

საბჭოს წევრმა, თამარ მამსიკაშვილმა, კითხვით მიმართა სკოლის წარმომადგენელს სკოლაში არსებული თოთხმეტი უსტატუსო მასწავლებლის შესახებ. კერძოდ, იგი დაინტერესდა, რა მიზეზით ვერ მოხერხდა აღნიშნული პოზიციების შესაბამისი კვალიფიკაციის მქონე მასწავლებლებით სკოლის დაკომპლექტება. სკოლის წარმომადგენელმა, ბელა კაპანაძემ, აღნიშნა, რომ რეგიონში კვალიფიციური კადრების დეფიციტის გამო ვერ მოხერხდა შესაბამისი კვალიფიკაციის მქონე მასწავლებლების მოძიება. მისი თქმით, სკოლა წლის ბოლომდე გამოაცხადებს ვაკანსიებს კვალიფიციური კადრების მოზიდვისა და დასაქმების მიზნით.

საბჭოს წევრმა, მანანა თურქაძემ, კითხვით მიმართა დაწესებულების წარმომადგენელს ფინანსური უზრუნველყოფის საკითხთან დაკავშირებით. დაწესებულების წარმომადგენელმა განმარტა, რომ სკოლა ელოდებოდა საიჯარო შემოსავლის მიღებას, რაც მნიშვნელოვნად დაეხმარებოდა დაწესებულებას ფინანსური მდგომარეობის გაუმჯობესებაში.

საბჭოს სხდომის თავმჯდომარემ მიმართა საბჭოს წევრებს, ხომ არ ჰქონდათ დამატებითი შეკითხვები სკოლის წარმომადგენლებთან ან ექსპერტებთან.

საბჭოს წევრებს შეკითხვები არ ჰქონდათ.

საბჭოს სხდომის თავმჯდომარემ კენჭისყრაზე დააყენა საკითხი, სსიპ - შპს ხერხემის კერძო სკოლის მონიტორინგთან დაკავშირებით, ადმინისტრაციული წარმოების შეწყვეტის შესახებ.

ფარული კენჭისყრის მიზნით, საბჭოს სხდომაზე გამოცხადდა სათათბირო შესვენება.

დაწყების დრო: 14:50

დასრულების დრო: 15:40

კენჭისყრის შედეგები:

მომხრე- 13

წინააღმდეგი - 0

გადაწყვეტილება:

ზოგადსაგანმანათლებლო დაწესებულებების ავტორიზაციის ექსპერტთა ჯგუფის დასკვნის პროექტზე დაწესებულების მიერ წარმოდგენილი არგუმენტირებული პოზიციის, ზოგადსაგანმანათლებლო დაწესებულებების ავტორიზაციის ექსპერტთა ჯგუფის დასკვნის, ზოგადსაგანმანათლებლო დაწესებულებების ავტორიზაციის საბჭოს სხდომაზე დაინტერესებული მხარის მიერ დაფიქსირებული პოზიციის შესწავლის, შეფასებისა და ურთიერთშეჯერების საფუძველზე, საქართველოს განათლებისა და მეცნიერების მინისტრის 2010 წლის 1 ოქტომბრის N99/5 ბრძანებით დამტკიცებული „საგანმანათლებლო დაწესებულებების ავტორიზაციის დებულების“ 27-ე მუხლის შესაბამისად, შეწყდეს ადმინისტრაციული წარმოება სსიპ - შპს ხერხემის კერძო სკოლის (ს/კ: 224089420) მონიტორინგთან დაკავშირებით.

საბჭომ შუამდგომლობით მიმართა ცენტრს მონიტორინგის განხორციელებასთან დაკავშირებით:

მონიტორინგის დაწყების პერიოდი: 2026 წლის აგვისტოდან;
მონიტორინგის განხორციელების ფორმა: ადგილზე ვიზიტი;
მონიტორინგის ფარგლები: 1-ელი, მე-3 და მე-4 სტანდარტები“

2. ზოგადსაგანმანათლებლო დაწესებულებების ავტორიზაციის საბჭოს 2026 წლის 24 ივლისის N972520 სხდომის ოქმის პირველი ნაწილი ცნობილ იქნას ამ გადაწყვეტილების განუყოფელ ნაწილად;

3. ზოგადსაგანმანათლებლო დაწესებულებების ავტორიზაციის საბჭოს საბჭოს გადაწყვეტილება შეიძლება გასაჩივრდეს სააპელაციო საბჭოში ან/და ქ. თბილისის საქალაქო სასამართლოს ადმინისტრაციულ საქმეთა კოლეგიაში (მის.: ქ. თბილისი, დავით აღმაშენებლის ხეივანი №64) მისი ოფიციალურად გაცნობიდან ერთი თვის ვადაში, საქართველოს კანონმდებლობით დადგენილი წესით.

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს მდივანი
ბერიკაშვილი ნინო

ნ. შიშოვა

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს თავმჯდომარე
წიფურია ეკატერინე

ე. წიფური

